



TAPAK 8

Kremlin anemsang Alexie Navalny Russia-i aotsü

TAPAK 10

Aryna-i Abu Dhabi Open kokogo



VOL. XVIII NO. 90 (ADOK 90) DIMAPUR

YANGTEPNÜ (THURSDAY) AENJETI (JANUARY) 14, 2021

₹ 5.00

Gauhati High Court-i Assam Leader of Opposition metentsür

Guwahati, January 13 (Agencies): Assam Assembly Speaker-i Debabrata Saikia dang nungi Leader of Opposition agienba sota atatsü atema Gauhati High Court-i tetuyuba agütsüogo.

January 1, 2021 nü Assam Assembly Speaker-i Leader of Opposition agien. Congress lennir anati party toktsür BJP nung adenba sülen Speaker-i iba ya osang ya sangoktsü.

Congress züngsem 2 BJP nung adenba sülen züngsem 126 agi akümba Assam Assembly nung Congress nübo 20 dang aküm, aser iba yagi Assembly nung züngsem ajak nungi troksü nungi kasü nübo nüngdakba meperii aküm.

"Züngsem 126 agi akümba Assam Assembly nung Leader of Opposition inyaktsü atema Congress nübo peria mali" ta January 1 nü Assam Speaker-i sangdong agütsü.

Assembly Speaker-i iba sangdong agütsüba sülen Leader of Opposition, Saikia-i Gauhati High Court nung ken o benoka liasü.

Tanü Saikia-i benokba ken o angadangdang Justice Achintya Malla Bujur Barua-i pa Leader of Opposition agienbaji tim dang ta ashi.

"Debabrata Saikia ji Assam legislative assembly nung Indian National Congress legislature party indang lennir masü ta okadak nem kuli kecha magütsü. Anungji, iba nung ajemdaker leader of opposition-i benokba ken o metentsür" ta Justice Bujur Barua-i tetuyuba agütsüdang ashi.

"MLA kati Leader of the Opposition inyaktsü atema onük ana nüngdaker" ta Saikia atema advocate Satyen Sarma-i okadak ashi.

"Mezüngbuba nung, Opposition nung nübo timba aliba recognised party ka nung lennir asütsüla. Tanabuba nung, iba MLA ji Speaker-i recognized Opposition party tulutiba nungi lennir ta agizütsüla" ta pai metetdaksü.

"Saikia-i iba nüngdakba onük anaprong tonga lir aser pa dak nungi mapa agienbaji iba onük ana nung ajemdaker inyakba masü. Anungji pa maneni Leader of the Opposition inyaktsü ozüngi melar" ta Satyen Sarma-isa ashi.

Gauhati High Court-isa Assam Assembly nung Secretary aser Principal Secretary dang hopta ana tsüngda telangzüba meshia sangdong balala agütsüogo.

Kerala nung 'One school, One IAS' programme tenzüktsü

Kochi, January 13 (Agencies): Kerala nung shisashirtem aser retired IAS o IPS officers-i 'One School One IAS' ta ser sentong ka tenzüktsü.

India nung civil services ya loktiliba nung jenjang temaba nung alirtem atema dang lir ta tangatetba agientsü atema parnoki iba sentong tenzüker.

Iba sentong ya Vedhik Erudite Foundation Scholarship Programme kübok tenzüktsü aser tan hopta tatemlen Kerala Governor Arif Mohammad Khan-i tenzütsütsü.

Iba sentong ajanga sensaker saka tekolok tajung civil services aser tanga competitive exams agütsünür nem angati training agütsütsü, ta Vedhik Erudite Foundation-i metetdaksüogo.

Iba scheme ya sponsors-i teyari agüja nungiter aser Kerala kübok kaketshir 10,000

shi anioktsü alizüing lir.

January 16, 2021 nü Kerala Governor-i video conferencing ajanga iba sentong tenzüktsütsü.

Sentongji Grand Hyatt Hotel nung ayonga agitsü aser state Education Minister Prof C Raveendranath, Cardinal Mar George Alencherry, taoba Chief Secretary & UN Consultant Dr C V Ananda Bose, IAS, film actress Manju Warriar aser Vedhik IAS Academy nung ketdangsürtem adentsü.

Actress Manju Warriar-i sensaker kibongtem nungi kaketshir 10 yaritsü.

Kerala nung taoba Additional Chief Secretary O P Minocha, Retd Col D S Cheema, CMAI Association of India President Prof N K Goyal, senior IAS officer Vivek Atre aser Santhosh George Kulangara nungertemi kaketshirtem nem training agütsütsü.

COVID-19 Nagaland: Nisung 12,000 ajangogo

Kohima, January 13 (TYO): Bodbarnü Nagaland nung nisung 6 dak COVID-19 putetba züngsema nisung 12,000 ajangogo.

"Tanü nisung 7 tashi taneptsü angu saka nisung 6 dak COVID-19 aliba putetba züngsema nisung ajak agi 12,003 kümogo" ta Health & Family Welfare Minister, S Pangnyu Phom-i ashi.

"Bodbarnü putetertemji Dimapur district nung asem aser Kohima, Mokokchung o Mon district tem nung kaka lir" ta pai metetdaksü.

Taneptsü angur nisung 7 rongnung Kohima district nungi 6 aser Mokokchung district nungi ka lir, ta Minister Pangnyu-isa ashi.

Nisung 12,003 rongnungi 11,674 taneptsü nguogo aser 103 anepaludar, ta paisa shisem.

"Nagaland nung COVID-

19 puteter nisung 86 tashi asü. Tasürtem rongnung parnok 76 coronavirus ajanga aser 10 tanga timtem ajanga asü" ta Health & Family Welfare Director, Dr Denis Hangsing-i metetdaksü.

Nisung 140 tashi tanga state temi ogo, ta paisa ashi.

District balala nung COVID-19 putetba: Dimapur (6,446), Kohima (3,731), Mon (605), Peren (504), Tuensang (244), Mokokchung (185), Zunheboto (142), Phek (47), Kiphire (41), Wokha (39) aser Longleng (19).

Nisung 12,003 rongnung Traced Contacts 4,925, armed forces personnel 4,659, tanga state tem nungi arur 1,847 aser Frontline Workers 572 lir, ta Dr Hangsing-isa ashi.

District balala nung tang anepalurtem: Dimapur (66), Kohima (25), Mokokchung

(7), Peren (2), Mon (2) aser Longleng (1).

"Tang anepalurtem rongnung parnok 13 dak shirangba yimya terara lir, ana kanga shiranga oxygen agidar aser 2 ventilators nung lir. Nisung 86 dakbo shirangba yimya kecha mali" ta Dr Hangsing-isa ashi.

Taneptsü angurtem: Dimapur (6,249), Kohima (3,649), Mon (592), Peren (499), Tuensang (243), Mokokchung (169), Zunheboto (139), Phek (50), Kiphire (40), Wokha (35) aser Longleng (9).

"Nagaland nung COVID-19 alitsü akok ta temolung meleme bilemba sample 1,22,366 tendangogo. RT-PCR ajanga sample 72,729, TrueNat ajanga sample 36,891 aser Rapid Antigen Test ajanga sample 12,746 tendang" ta Dr Hangsing-isa metetdaksü.

Naga Club tir Krurovi Peseyie mang remogo

Kohima, January 13 (TYO): Naga Club nung tir teinyakdak Krurovi Peseyie Hombar nikongdang alima nungi pilaogo. Pa arishi küm 84 tain liasü.

Mongulbarnü Centennial Compound, Baptist Church Jotsoma nung pa den asüpila sentep sentong agia liasü.

Asür Peseyie ya World War II matongdang aso aser pa indang diary nung Kohima nung raraba tulu pai ajangshiba indang zülua lir. 1954 küm pa Indian Army nung züngok aser 1962 tashi linük tenzük.

1995 küm pa Nagaland State Co-operative Bank indang Advisory Board Members nung züngsem liasü. November 14, 1996 küm Angami Public Organization nung Tir inyak aser Western Angami Pastor Deacon Association nunga Tatong Tir aser Tir inyaka liasü. 1977 nungi 1998 tashi asür Peseyie-i Baptist Church Jotsoma nung Deacon inyak.

1962 nungi 1995 tashi pai Government High School Jotsoma nung tesayur inyak aser Kohima Science College Jotsoma indang Advisory Board nunga züngsem ka ama shilem agi.

Asür Peseyie-isa Nagaland State Ex-servicemen League nung Acting President aser Kohima Ex-servicemen Union nung President mapa inyak. 1998 küm pa Naga Hoho nung Speaker liasü.



Krurovi Peseyie (File photo)

Maneni, paisa 2011 nungi 2014 tashi Angami Public Organisation indang mezüing Advisory Board Members nung züngsem liasü. November 14, 2018 nü pa Naga Club nung tir inyaktsü shim aser pa tango tembangba anogo tashi inyakogo.

NAGA CLUB & MLA NAKHRO NUNGERI MANGYIMER:

Naga Club aser MLA Keneizhakho Nakhro nungeri sangdong balala ajanga asür Krurovi Peseyie mangyimba osang metetdaksüogo.

"November 29, 2018 nü Baptist Church Jotsoma indang Centennial Amphitheatre nung Naga Club indang Centennial Jubilee amongbaji Krurovi Peseyie tashi ajanga liasü aser iba ajanga pai mapa tulu inyaktetba kuli agütsür" ta Naga Club tatong tir Khinyi Woch aser senotsü zülur Kuolachalie

Seyie nati sangdong nung ashi.

"Taoba Naga Hills nungi teintet rogotemi Naga Club tenteter küm 100 ajungba amongtsü atema club asentenshitsü süoki ia bilem. Iba atema jembishnüa arur June 2, 2017 nü Naga Club Building, Kohima nung Naga kin nungi teshimtet nübotem senden ka amendang Ad-hoc Office Bearers nung Chairman inyaktsü atema Krurovi Peseyie shim. Iba sülen November 14, 2018 nü Krurovi Peseyie tir sür kümsük küm asem atema ketdangpurtem shima liasü" ta tenatisa metetdaksü.

"Ozü tir Krurovi Peseyie asübaji onok atema takoksa tulu ka lir aser par kibong den asükhu aser mangyim lemsateper. Onoki meima aliba Tir Krurovi Peseyie-i Naga nunger aser Naga Club atema inyakba mapatem onoki teti bilemtettsü" ta Naga Club sangdong nungsa ashi.

Tanga sangdong ka nung, 8-Western Angami Assembly Constituency MLA, Keneizhakho Nakhro-i Peseyie asüba atema aoksaba osang metetdaksü.

"Asür Krurovi Peseyie-inisung aika ajungmesogo. Tanü ya Angami nunger aser talisa Western Angami nunger asoshi tammang anogo ka lir, kechiyong asenoki lennir tajung ka samaogo," ta MLA Nakhro-i ashi.

COVID-19 mozü indang metetjema alitsü kar



Dimapur, Aenjeti/January 13 (TYO): India tesem ajungalen nüburtem nem COVID-19 tashidak atema mozü agütsütsü telemtetba agir ketdangsürtem ammag-sangwa memeteti maparen balala inyaktepba mapang lir. Iba dak sendakba nung nüburtemi metetjema alitsü atema Department of Health & Family Welfare, Government of Nagaland ajanga tasüngdangba kar jangjatsüba yamai alitsü"

1. COVID-19 mozü ya ajak nem mapang ka nung agütsütsü asü?
- * Mozü angutsü aliba nung ajemdaker Government of India ajanga priority group tem lemsaogo aser parnok nem mozü ya mezüng agütsütsü, kechiaser parnok iba tashidak agi meneptsü tezüpaba lir. Mezüngbuba telok nung healthcare aser frontline worker tem dena lir. COVID-19 mozü agitsü atema tanabuba telok ya arishi küm 50 dak tema aser arishi küm 50 tekübok süaka mesüktepba tashidak agi menepa alirtem alitsü.
2. Nisung ajak iba mozü ya agitsüla asü?
- * COVID-19 atema mozü ya pei sasa molungteta agitsüba lir. Ajisüaka iba tashidaki nungi pei kumzüka alitsü aser kinunger, medemer aser külemi inyaker tsünga iba tashidak prokshia aoba ajemdaksütsü mechi iba mozü ya agi tajungba.
3. Mozü ya mapang tatsüka tsünga tendanger benoka amshir asünung timtem majurutsü asü?
- Ø Mozü kati temang nung timtem agitsüba aser mapa inyakba nung ajemdaker regulatory body ajanga mozü ya linük nung amshidaksür.
4. Tang COVID-19 (tejangja mesüra temolung melemtet) alir nem iba mozü ya agütsütsü ako asü makok?
- * Item nisung yagi kasa tashidak ya mozü agitsüba tesem nung prokshitsü akok. Iba yongji tashidak keta aliba jangjateter anogo 14 bo mozü ya magi atatsüla.
5. COVID-19 nungi taneptsü ngur alirtema iba mozü ya agitsüla asü masü?

- * Taoba mapang COVID-19 agi menepa taneptsü ngur liaka COVID mozü ya agi tajungba. Ibaji ajanga temang nung tashidak anema immune tashi ita kumdaksütsü.
- 6. Mozü balala anguba rongnungi koba shimteta agitsüla?
- * Vaccine candidate tem clinical trial indang safety & efficacy data ya asen linük indang Drug regulator ajanga tendangba sülen ang amshitsü atema temelaba agütsür. Anungji license ngua aliba COVID-19 mozü ajak kasa shi alitsü. Ajisüaka mozü ya tatem tashi kasa dang agitsüla, kechiaser COVID-19 mozü melentepa agitsü makok.
- 7. India nung benoka aliba mozü ya danga linüktem nung benoka amshiba mozü ama mapa inyaksü asü?
- * Hao. Danga linüki yangluba ama India nung amshiba COVID-19 mozü yagia kasa mapa inyaksü. Safety & efficacy alitsü atema vaccine trial ya tabu balala agir.
- 8. Health Department nung tenüng mezülüoki COVID-19 mozü ya agitetsü akok asü?
- * Masü, COVID-19 mozü agitsü atema iba mozü agitsüpur tenüng zülüoktsüla. Tenüng zülüokba sülen ang iba mozü agitsü tesem aser mapang ya metetdaksütsü.
- 9. Iba mozü agitsü atema tenüng zülüokba mapang document kechisa nungdaksü?
- * Noksa keta aliba item ID ya mashi ka nungdaksü - Aadhar Card, Driving License, Health Insurance Smart Card, MGNREGA Job Card, MPs/MLAs/MLCs nem agitsüba Official identity card, PAN Card, Bank/Post Office ajanga agitsüba Passbook, Passport, Pension Document, Service Identity Card, Voter ID, NPR kübok RGI ajanga agitsüba Smart card.
- 10. Registration/Session site mapang Photo/ID nungdaker asü?
- * Tejangja nisung nem mozü agitsüoigo ta metettsü aser

jangjatsü atema registration aser verification of beneficiary nung photo ID ya nungdaksü.

11. Mozü agitsüpur temi komaser mozü agitsü anogo metettsü?
- * Online registration agiba sülen mozü agitsü anogo, tesem aser mapang atema parnok indang registered mobile number dangi SMS yoktsü.
12. Mozü agimaba sülen mozü agir alirtemi parnok mozü agiba indang osang angutsü asü?
- * Hao. COVID-19 mozü agiba sülen mozü agir indang registered mobile number dangi SMS arutsü. Mozü dose ajunga agiba sülen mozü agir indang registered mobile number dangi QR code based certificate ka yoktsü.
13. Cancer, Diabetes, Hypertension amala tashidak atema mozü agia alirtemi COVID-19 mozü ya agitsü akok asü makok?
- * Agitetsü, iba amala tashidak alirtem ya high risk category nung züngshir. Parnoka COVID-19 mozü ya agitsü tim.
14. Mozü agiba tesem nung jelia inyaksü nungdak lir asü mali?
- * COVID-19 mozü agiba sülen vaccination centre nung tajemba agi ghonda tesadang ka anisüngzüksü ajungshir. Mozü agiba sülen meinprong kar metetra anasatiba health authorities/ANM/ASHA nem osang agüjang. Maneni mask agitsü, teka müreka ayutsü aser physical distance (mesüra feet 6) alitsü kodanga mamadoktsüla.
15. COVID-19 mozü agiba ajanga temang nung danga timtem ali mali?
- * Timtem mali ta kuli ngutetba sülen ang COVID mozü ya amshitsü. Mozü danga nung ama nisung kar ajem agidak tesem nung arungtsü aser ashitsü akok. Nüburtem nem tajungtiba nung mozü agitsüba mapang COVID-19 mozü dak sendakba nung timtem kar danga adokra itemji anepalutsü atema state tem dang renemshia alitsü shiogo.
16. Nisung kati mozü ya dose kwi agitsü aser tetsünga nung mapang kobika alitsü tim?
- * Mozü ya dose ana, anogo 28 tetsünga iter agitsüla.
17. Antibodies ya kodang nungi renloktsü? Mezüng dose agiba sülen, tanabuba dose agiba sülen mesüra iba dang temonuba nung?
- * Antibodies indang protective levels ya yimya agi COVID-19 mozü dose tanabuba agir hopta ana lir renloker.

Nagaland nung Jan. 16 nungi COVID-19 vaccination drive tenzüksü



Dimapur, Aenjeti/January 13 (TYO): Nagaland indang Chief Secretary mendenpuba sür state nung COVID-19 Vaccine indang Steering Committee pur senden ka January 13, 2021 nü Civil Secretariat Conference Hall, Nagaland Civil Secretariat, Kohima nung mena liasü.

Principal Secretary, Health and Family Welfare, Amardeep Bhatia, IAS ajanga ashiba agi, state atema central sorkari COVID mozü 26,500 agüja lir aser item ya Central aser State health worker aser State police nem agütsü. Iba vaccination drive ya January 16, 2021 nung tenzüksü aser iba sülen tanabuba aser tasenbuba phase tenzüka aotsü.

Mozü ya yakta bener arutsütsü aser state kübok district ajak nung belenshitsü atema achayanga lir, ta Bhatia-

i metetdaksü.

Mezüng phase atema tesem tem aneplua renem lir, ta pai iba senden nungsa metetdaksü.

Pai ashiba agi, mozü ya dose ana nung agütsütsü aser dose tanabuba agir anogo 14 lir ang mapa inyaksü.

Iba maparen metembang tashi nüburtemi COVID yimya shidak amshia alitsüla, ta pai ashi.

State nung iba mozü agitsüba maparen tenzüka sülen state sorkar indang department balala nungi amalitep kaa yariteptsüla, ta Principal Secretary ajanga ashi.

COVID-19 mozü dak sendakba nung olulu aser taila osang prokshiba nungi nüburtem jenbua aser kumzüka alitsü atema awareness sentong balala ayongzüksü atema paisa ashi.

Home Department ajanga metetdaksür

Dimapur, Aenjeti/January 13 (TYO): State Disaster Management Authority (SDMA) aser State Executive Committee (SEC) ajanga telemtetba agiba nung bendenoksema state sorkaria Home Commissioner indang office nungsa Disaster Management Act 2005 Section 14 (1) nung shia aliba ama Secretariat of Nagaland State Disaster Management Authority, Home Department indang Administrative Head of Department (AHoD) aser Commissioner Disaster Management/ Relief Commissioner alitsü, ta sangdong ka ajanga

metetdaksüoigo.

Disaster Management Act 2005 nung temelaba agüja aliba ama line Department tem den osang agitepa sentong yanglutsü, guidelines, capacity building, senotsü aser nübu atema rongsen bushitsü khuret ya Nagaland State Disaster Management Authority Secretariat, Home Department ajanga abentsü.

Disaster Management Act 2005 Section 14 (1) nung zülüa ali ama Nagaland State Disaster Management Authority Secretariat ya Home Department indang division ka lir, ta sangdong ajangasa ashi.



Bodhbarnü Udaipur nung aliba Mata Tripura Sundari Temple anasa nashi abenba gari ana nung yangji alirtemi mi sena rongdoksü. Yangji alirtemisa gari anir aser teyariteper pezü pua liasü. Osang ajanga ashiba agi, gari ana nungya ashi ter bener Assam kübok Karimganj district nung aliba Pathakandi leni oa liasü.

Williamnagar Civil Hospital-i Kayakalp Award angu



Guwahati, January 13 (Agencies): Meghalaya nung Williamnagar Civil Hospital-i Kayakalp Award kübok mezügbuba jenjang takok nguogo.

Williamnagar Civil Hospital ya East Garo Hills district nung lir.

Ministry of health & family welfare-i May 2015 nungi Kayakalp Awards agütsütsü tenzü. India nung health care facilities nung merükmejuba aser metsümeshidak timi ayuba repranga iba sempet

agütsür.

Iba sempet ya district hospitals, sub-divisional hospitals, community & primary health centres aser wellness centres nem agütsür.

Yaküm Williamnagar Hospital-i tanabuba jenjang nung takok ngua liasü.

Meghalaya chief minister Conrad Sangma-i Twitter nung mozü ki staff nem tenügsang agütsüba metetdaksüogo.

"2019-20 atema MoHF-i Williamnagar Civil Hospital

nem Kayakalp Award agütsüogo.

Health Department Staff ajunga nem tenügsang agütsür. East Garo Hills district aser Williamnagar Civil Hospital-i mapa tajung maneni inyangkama" ta Conrad Sangma-i ashi.

Mongulbarnü video conferencing ajanga Union minister for health & family welfare Harsh Vardhan aser Minister of state for health Ashwini Kumar Choube nati India nung health facilities balala nem sempettem agütsü.

Tripura nung journalists nem COVID-19 vaccine agütsütsü: CM Deb

Agartala, January 13 (Agencies): Tripura nung journalists-i COVID-19 vaccine angutsü ta Chief Minister Biplab Deb-i metetdaksü.

"Chief Minister Biplab Deb-i journalists ya frontline warriors lir anungji COVID-19 vaccine tongti süa agütsütsü nangzüokogo" ta Agartala Press Club Secretary, Pranab Sarkar-i ashi.

Tripura nung media nisungtem den parnok kibongtem nem priority basis nung COVID-19 vaccine agütsütsüla journalist fraternity-i akhangba Chief Minister-i agizük.

Tripura atema COVID-19 vaccine doses 56,500 tashi Agartala tongogo.

Linük den külemi Tripura nunga January 16 nungi

vaccination drive tenzütsü.

January 16 nü state kübok tesem 15 nung vaccines agütsütsü ta National Health Mission (NHM), Tripura Director, Siddhartha Jaiswal-i metetdaksüogo.

"Vaccination drive mezügbuba shilem nung health workers 45,000 nem COVID-19 anema vaccine agütsütsü" ta Siddhartha Jaiswal-i ashi.

Lakhimpur Police-i Tokay gecko ka kümzük

North Lakhimpur, January 13 (Agencies): Lakhimpur Police-i Nagaon Chariali nung nisung ka ket nung Tokay gecko bena lia apu.

Osang tejangja ka angazükba sülen police-i Babusa Moshahary apu. Pa ya Pameng nunger Kaneg Mosharay'er jabaso lir.

Babusa-i motorcycle ka nung Tokay gecko ji juli ka nung bener lia apu. Police-i pa den külemi shiruruji Lakhimpur forest department ket nung agütsü.

Forest department ketdangsurtemi Tokay gecko ji Kakoi Reserve Forest nung chiokogo.

Iba tatalokba ajanga Lakhimpur district nung arem shiruru mashimashii shibelenba



sayur. Talisa, iba mapa ya Kakoi aser Dulung Reserve Forest areas nung inyaker.


Kakoi Reserve Forest nungi wild orchids aika Arunachal Pradesh-i bener oa yokogo. Parnoki wild orchids seret ka nung Rs. 500 agi ayok ta osang angazüker.



Manipur Chief Minister N Biren Singh-i Imphal airport nung COVID-19 vaccines agizükba noksa nung angur. Bodbarnü Serum Institute of India (SSI), Pune nung yangluba Covishield vaccine dose 54,000 tashi Imphal tongogo. (Imphal, January 13)

Covid-19 Vaccine nung timtem kecha mali

COVID vaccination atema renema liang! Vaccination indang inyakyim sülen anidakang.



24/7 State Health Helpline: 1800-345-0019; National Toll Free: 1075



GOVERNMENT OF NAGALAND
DEPARTMENT OF HEALTH & FAMILY WELFARE



When we are safe,
Nation is safe!



TIR YIMYIM

YIMOBILEM (EDITORIAL)

DIMAPUR YANGTEPNÜ, AENJETI (JANUARY) 14, 2021

SARU SARUBA ASER MESARUBA TEBILEMTSÜ

N agaland nung telok balalai saru saruba agi shishilembadak jangotsü aser osettsüset nung jenjang atuba anema mapang mapang shia lokti tentet balalai ola adokba asenoki angashir saka saru manener. Ano külen, tang Dimapur nung Dimapur Municipal Council purtemi yimti nung shishilembadak aser yimti süngküm nung tangalen nungi khu bener aruba garitem dang nungi saru sarutsü melen, parnok mesarur saka parnok melen tangar telok nem sarudaktsür. Tetezü, DMC saruji DMC purtemi mesarui rangben jenjang ka ataktetter tangar teloktem dang ayoker aser item teloktem jagi sarur. Ibayongji, saru sen ka agitsüba to ana agir aser iba senji gari mesüra dokan kiburi masü saka nübortemisa agütsür. Tatishitsü agi, Assam len nungi lisem gari ka sünga atudang, Dimapur süngküm nung DMC saru sen 50 agitsü melen DMC tenüng nung saru sarutsü contract mesüra lease nung agirtemibo sen 100 meshitsü akok. Iba senji gari kibur mesüra gari anishisangi agütsütsü masü saka lisem alisangi agütsütsü aser jungjunga bilemdangra lisem alisangji asenok lir. Iba amaji jangotsü aser osettsüset abenertem dang nungi DMC aser telok balala tenüng nung meshiba sen ajak to tayoker aser tabenertemibo talisang dang nungi dang agitsü. Iba amaji anogo shia asenoki dokan nung shishilemba dang jang seret nung sen anabo, cement bag nung sen terbo aser lisem gari ka asüng nung sen noklang kabo saru sarurtem nem agütsübatō menoktsü asoshi meshiba agütsüdagi ta bilemdi. Aji oda, kari gate nung meshir aser ibaji asenoki talidak dokan nung agütsür ta asenoki saru sarur aika mesüdagi. Iba timtem takoksa nungi nübortem kümzüksü atema lokti tentet lenirtem aikati nüngsen agiba dang masü saka taküm agia tendanga ola adokba asenoki angashir. Idangji, asenok ajemajema mekazüi asenoki ola adoktsüla aser asen lima ya sarubo talila sarur saka terenlok mapabo kecha meinyakba lima ka masü saka saru shitak sarur terenlok mapatema shitak inyaka aoba lima ka kümdaktsütsü tim. Atangji, alemli nungi asen sobaliba nunga saru agidang yimten mapa inyaker. Ajisüaka, alemli otsüla oboula nungertem mapangbo tanü amshiba sen ya amshitsü mapitet aser maka nungji, yimten saruji sen masü tsük saru saruang liasü. Iba jagiang asen Aor yimtak yimten saru dang jangkudok ta aser saru agütsürtem dangji jangkudoker ta ajar. Atangji, tanüa yimtak yimtsüng nung putu menden kübok yimsüsübaren nungbo küm shia kilen saruji tsükang yimchi agi meteta agüja alitsü, saka ano tebilemtsükaji yimtak alirtema tanübo teimbakati tsüklu mayimer, anungji yim saruji tsük agi sen kümer sarua alitsüa akok. Iba saru jagi dang yimsüsürtemi yim asoshi mapa inyaktsü. Shitakba agibo, asenoka tsümartem amato peii ajangzüktetba senotsü nungi government nem saru ka, income tax, agütsütsüla. Iba jagi dang shiba kechi mapa nungi sen kwika tajangzüik angur metettsü aser nisung ajaki ochishia alitsü merangtsü. Ano külen, iba sen jagi government nung alirtemi nübortem asoshi terenlok mapa inyaktsü. Ajisüaka, tanübo asenoki tagütsütsü tim sarubo magütsür saka magütsütsülabo aika nem agütsür. Ano, saru sarutsü purtem Taxes, Forest, Power, PHE, NST, Municipal aser Town Council amala nung ketdangsertemi saru junga saru nungbo government-a takar akümtsüba ser nung, junga mesarur saka mesarutsüla purtemiang kanga nendaka sarur. Iba jagi nübortemi meteta aser memeteti kanga akoksar aser asen lima tereprangtsü nunga topur majung aser tejembidanga tanganütsü maket kümdaktsür. Atangji, saru sarutsü purtemi saruyonga ochimeshira, tangar nem sarudaktsüba dang nungi tamajungba asütsü. Iba jagi Dimapur Municipal Council purtemi, temeshitsüka meshirbo, parnok melen tangar nem sarudaktsür asütsüa akok. Ajisüaka, ketdangser aser inyakterem rongnung khen ajungshiteper, pei lima aser pei yimti meima tangar nem mesarudaktsüi piesasa sarutsüla. Aiben yimten nung yimsüsürtemi pei office telong nung mener telemtetba agiba dak alaka pei lima, pei constituency, pei town aser pei yimtsüng telongtet nung kong kechi terenlok mapa inyaktsü nüngdaker, kong lenmang majung, kong tzü aser light junga marur aser kong merüka meyutetter, item tesemtemji mangur, kechiyong teti lenmang lendi ajanga gari nung dang jajar. Ajisüaka, kadang lenirtemi tetsüng agi nübortem alidak longa senzüdir, idangji dang kong kechi inyaktsü aser kechi nüngdaker, itemji repringtettsü aser saru koma sarutsü aser saru saruba langa terenlok mapa inyaka ali asü maliar pei tenük agi angutsü aser apijemtsü.

OLEMSABANG

DIMAPUR AO BAPTIST AROGO NUNGI METETDAKTSÜR

Temeim arogopurtem, ajak dangi Dimapur Ao Baptist Arogo Office ajanga Yisu Khrista temeim aser küm tasen tepela salem bener arutsür.

Asenok yaküm March ita nungi lokti tekülem mesentepteti online nung dang agia arur asünung ajaki lokti tekülem kanga menungraa tensa tajungba ka asoshi sarasadema arudagi. Tsüngremi mapang tajung ka bener arutsür ta amanga 17th January 2021 nungi lokti tekülem tenzüksü aser tekülem akatsü yimya teküpoklen agütsür.

Deobarnü fellowship sasep shia nung telok ana lemdanger tekülem anaben akatsü. Mezüng sentep 10:00 a.m. aser tanabuba sentep 01:00 p.m. nungi agitsü. 17th January 2021 asoshi group 1 10:00 a.m. aser group 2 01:00 p.m. sentep nung atentsü aser iba sülen melentepyonga aotsü.

* Aonung sentep aki ama ajak külemi agitsü.

* Tetsür sentep 14th January 2021 nungi fellowship sasep akatsü.

* Youth Ministry aser Christian Education Ministry mapang tajung ka maru tashi tang ama online nung agitsü.

* Tekülem asoshi SOP renemer tenla ki kima neploka yutsütsü ajaki tashi angaa inyaktsü mepishir.

FELLOWSHIP SHIA NUNG GROUP TELEMSA YAMAI ALITSÜ.

DUNCAN FELLOWSHIP

Group 1 - Duncan – Supply Colony – River Belt

Group 2 - Lanmark – Residency Colony – Dimapur Govt. College Area

TOWN FELLOWSHIP

Group 1 - Notun Basti – LRC – Island Colony

Group 2 - Forest Colony – Zeliangrong Colony – Dhobinala – Nepali Bosti – Middle Point – Churches Colony – NST Colony – Kher Mahal – Neisatou Colony – Lake View

SÜMEDEM FELLOWSHIP

Group 1 - Anitet – Bethel – Taxes Colony – Libaim – Church Area – Kuda Mill Area - Yimdong Mepu

Group 2 - Tuesday Bazaar Area - Grace Colony - Aokong – Firing Area - Industrial Estate - Hill View – DC Court Area

YINSEM

Group 1 - Bank Colony – Super Market Area – Govt. High School Area – Church Colony – Mao Colony

Group 2 - Medical Colony – Tourist Lodge, NST Station and Railway Area – Master Colony – Salopang – Marcofed Area – Panchayat Area

SIGNAL

Group 1 - Forest Colony – Sematilla – Naga Gaon – St. Paul School Area – Transformer Area – Indian Oil

Group 2 - Lower Livingstone School Area – Upper Livingstone School Area – DBC Area –Sericulture I & II

MERALI FELLOWSHIP

Group 1 - Nepali Kashiram – Oriental Colony – Land Record

Group 2 - Voila Colony – Sewak – Lotha Colony

LUNG MEN FELLOWSHIP

Group 1 - Walford – Police Colony – Power House Area – Veterinary Colony

Group 2 - Naga Colony – Sunrise Colony – Jasokie Colony – Mao Colony – Sangpangtu Avenue – Semasa Colony – Rainbow Colony

YONGKUM FELLOWSHIP

Group 1 - Imkonglenden B & C

Group 2 - Imkonglenden A – Ura Villa – Circuit House Area

Electrical Prayer Cell

Group 1 - Lungwiram – Church Area – Belgram Area

Group 2 - Valley View – Electrical Colony – Mishikito – River Belt

Nenok Den Külem Tenzüker

REV. I. WATI, PASTOR

DIMAPUR AO BAPTIST AROGO

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Texas nung pastor, Matt Netzer gari lendong nung asü



Texas (US) nung aliba RockPile Arogo nung pastor, Matt Netzer'er kibong tangokba noksa nung angur.

January 13, 2021: Marble Falls, Texas nung aliba Rockpile Arogo nung pastor, Matt Netzer Hokolbarnü (January 8) gari lendong ka nung süogo.

Arrshi küm 44, pastor Netzer ya 1999 küm nungi iba Arogo nung pastor inyaker; pa 2018 Mazda CX-5 gari nung Kingsland leni aoba mapang gariji lenmang nungi pilaa oor atsü ka nung tsükoktsü, ta Texas Department of Public Safety-i metetdaksü.

Iba lendong atalokba sülen pa Baylor Scott & White Medical Center-i anir ao, ajisüaka mekümzükteti asü.

Taoba Hokolbarnü US Tir Donald Trump pusemertemi Capitol amakba dak sendakba nung Pastor Netzer-i par Arogo züngsemtem dang social media nung kanga kümdanga pei tebilembatem lemsateptsü

mepishiba sülen ghonda ishika tsüngda pa gari lendong nung asü.

Pastor-i Arogo züngsemtem dang, "Nisung ajaki rara, Trump, Biden, election, linük shibangba, mask agiba, Democrats aser Republicans onüktem jembiner aser pei tebilemba lemsatepner. Item onük nung ajaki shisadanger aser tebilemba lemsateper. Ni-a nenok amaji inyaker. Ni status 1,000 shi indokogo, kechiyong ni-a kü tebilembatem/tangatetba melenshir, aser ibaji tajung," ta ashi.

"Ocettem lemsateper. Iba ya ajanga rara taliba adokdaksür. Pei tebilemba lemsateptsü atema ajak ket nung sabang lir (social media) saka aiben tajangzük mangur. Ni ashitsü agibo social media ajanga takoksa kanga angur.

Asen linük nung ain adokba aser rara adokdaksüba tongti kuli rongnung social media densema lir," ta pastor-i ashi.

Paisa, Khristantemi social media nung pei tebilemba lemsatepba dang nungibo taliba sarasademtsü nüngdak, ta ashi.

"Ni ozü Arogo dang social media nung pei tebilemba lemsatepba dang nungibo taliba sarasademtsü mepishir," ta pai ashi.

Pastor lendong nung asüba sülen pai toktsüba kinüngtsü aser tanur ana- Lucy aser Micah nunger yaritsü atema US sen 100,000 sarutsü nükjidong nung Arogoi GoFundMe campaign tenzükogo aser Mongolbar (January 12) nikongdang 5:00 ako tashi nung US sen 69,680 dak tema sarutetogo, ta Arogoi metetdaksü.

Arogoi sangdong ka ajanga, "Onoki par kibong yariner, kechiyong Mathi 22:37-40 nung shia aliba ama pai Tenyaba mapa tulutiba inyakogo. Yisui, 'Nai nü Kibuba Tsüngrem temelungjang ajak agi aser tanela ajak agi meimang' ta ashi. Iba ya ozüng tulutiba lir. Tanabuba ozüngji 'Nai nü kiyonger pei ama meimang.' Ozüng aser ainkar ajaki iba ozüng ana nung ajemdaker jemi," ta metetdaksü.

Netzer nüngtem nung sentong ka January 16 nü First Baptist Church Marble Falls nung agitsü aser St. Louis, Missouri nunga pa nüngtem nung sentong ka agitsü tebilemba lir, ta Arogoisa metetdaksü.

Alima nung Khristan 8 shia katibo reshikangshi ajurudar: Open Doors

January 13, 2021: Alima nung Khristantem reshikangshiba asadangba telok- Open Doors-i, pei tamangba yimsü ajanga alima tesem balala nung Khristantem kanga reshikangshidar, aser tang tamajungba kümogo, ta metetdaksü.

Open Doors-i, tang alima nung reshikangshi tia nung aliba Khristan million 340 dak tema lir, aser alima nung Khristan 8 shia nungi katibosa reshikangshi ajurudar, ta metetdaksü.

Open Doors-i 2021 World Watch List (WWL) sayaogo aser iba nungji alima nung Khristantem tamajungba reshikangshiba linük 50 sangdonga lir; item rongnung linük tamajungtibaji North Korea linüksa lir.

1. North Korea: North Korea nungbo na Khristan ta metetra tepsettsü. Na i d a n g y o n g j i s a metepsetyonga yimtenren nung aibelener ka ama labour camp-i anir aotsü.
2. Afghanistan: Afghanistan nung ISIS aser Taliban

kiralongrartemi maneni timtem kanga agütsür, aser Khristantem jenti tepseter.

3. Somalia: Somalia nunger tongti maitsü rongnung Islam yimsü densema lir, aser Somali nunger kar danga Khristan yimsü dangi meyipba jangjara lendong ajurutsü. Kibong züngsemtemi, kin mesüra yimertemia parnok amokmerentsü mesüra tepsettsü.
4. Libya: Libya nung pei tebilemba lemsateptsü temeden mali aser tamangba yimsü ajak sadoka mamangteter. Libya nung Khristan nütsüng 34,500 shi lir, ajisüaka Libya nunger Khristanbo 150 shi dang lir.
5. Pakistan: Pakistan nung Tsüngrem mezüngmeshiba ozüng lir, aser item ozüng nung ajemdaker Khristantem anema inyaker.
6. Eritrea: Iba linük nung sorkari Khristantem anema mita aoer, Laishiba densema Khristan kaketterem apur aser house churches raksatsür. Ken o mangadangi Khristantem apur aser

tepuokdak ayur.

7. Yemen: Yemen nung Khristantemi pei tamangba yimsü mimshitsüsa akümer, kechiyong Khristantem nem tasüba temerenshi agütsür. Iba linük nungbo Islam yimsü toktsütsü makok aser Yemen nunger ajak Muslim nunger ta züngshir.
8. Iran: Iran nung sorkari Muslim nunger Khristan yimsü dangi meyipba nokdang aser Khristan yimsü ya bendanger yimsü ama züngshir.
9. Nigeria: Alima nung Khristantem timba tepsetba linükji Nigeria lir. Iba linük nung Boko Haram, Hausa-Fulani Muslims aser ISWAP densema Islamic telok balalai Khristantem reshikangshir aser tepseter.
10. India: Hindu yimsü alia amangertemi India nunger ajak Hindu asütsüla ta jembia Khristan aser Muslim nunger anema inyaker. Linük nung Khristan aser Muslim nunger samadaksütsü nükjidong nung parnoki minorities anema inyaker

ANOGO ABEN TSÜNGREM DEN

Temenenji Ozüng Raksaba

1 Yn 3:4

Tanelaren shidak asü masü tasadangba ka makai alibaji ne taküm asoshi lending lir. Tamang ozüng amaji , tanela ozüngji na tongdangtsü atema lir, nokdangtsüba masü. Nai ne nüji nung electricity ozüng raksaa inyaksü akok, saka yamaji inyakba tetezü tasüba bener arutsüakok. Yamaji nai Tsüngremer ozüngtem raksatsü makok item jagi na raksatsütsü. Tsüngremi tanela aser jakla ozüng yanglu aji nai sentoktsüji ne mulung, saka asenoki iba asen sasa teraksa agia inyaksü akok. Item ozüngtem ya mapang latetta maka. Sobalibai aji ajangtsü makok. Mapang mezütoktet. Tsüngremer ozüngji tatem maka nai amshira item yagi na kümzüksü.

Tsüngremer ozüngtemi na alener ta nai bilemtsü akok. Saka Tsüngrem o-l na tasüba nungi kümzüker (Rom 6:230.Tatishitsüagi Tsüngremi ne dang nüktapangta tebenshi ta ashir iba tetezü na satiba nung kechi tesendaktep lir aji satema agia pelaa lidaktsüner. Iba dang tali nai iba ozüng raksara kinüngpu aser kinüngtsü tsüngda, tsürabur aser tanürtem tsüngda, kinunger den tembartem aser arogo kibong den timtem aliba pai metetta lir. ne taküm asoshi Tsüngrem ozüngji koda tongtipang! Itemi meinyakra Tsüngremi na asoshi tepela rizünga yua aliba nai aoyar. Temenenji telemtet jenjang ka lir. Nai ne kiyonger mesüra lokti ajanga ne taküm asadangra, idangji nai ne taküm ozüng raksaba nung amendaker, aser ozüng raksabaji temenen.

Sudan linüki Israel den yimjung tezüngzüktep ka agiogo

January 13, 2021: Tawa 1 agütsütsü nangzük.

Middle East nung aliba linük aikati Israel den yimjung tezüngzüktep agiogo, aser tang tesüsa Sudan linükia Israel den yimjung tezüngzüktep agiogo.

US-i ketdangtsüba Abraham Accords kübok United Arab Emirates aser Bahrain nati Israel den yimjung tezüngzüktep agiba sülen Sudan-ia Israel den tezüngzüktep agi.

Yaküm October ita nung Israel aser Sudan nati yimjung tezüngzüktep agitsü bangjema liasü saka Sudan nung Parliament züngsemtem melentepba ajanga taoba hopta nung ang tatemsa telemtetba agiba sülen Bodhbarnü Khartoum, Sudan nung aliba US Embassy nung linüktemtsüngda iba tezüngzüktep agiogo.

United States tenüng nung Treasury Secretary, Steve Mnuchin aser Sudan tenüng nung Minister of Justice, Nasereldin Abdelbari nati tezüngzüktep nungji sign asü.


Kiralongrartem yariba linüktem tarensen nungi US-i Sudan agienogo aser US-isa Sudan nem loan US sen billion

Yaküm October ita nung US Tir, Donald Trump-i, "Parnoki tarutsü atema telemtetba agir, kong Arab nunger aser Israel nunger, Muslim nunger, Yihuda nunger aser Khristantem külemi tesünep nung litettsü, külemi sarasademtettsü aser yimjung aser tesünep nung külemi litettsü," ta metetdakja liasü.

Family Research Council nung Tir aser U.S. Commission on International Religious Freedom (USCIRF) nung taoba mapang Chairman, Tony Perkins-ia, "Sudan linüki USCIRF ajurua par linük nung ajak longjema litettsü atema lemsatepba atema Ato kilonser, Hamdok densema lenirtem dang pelar, kechiyong tesüiba küm 30 tashi iba linük nung yimsüsüba jenjang mejungi liasü," ta ashi.

Abraham Accords ya Middle East linüktem nung yimjung alitsü atema bangjemba tezüngzüktep ka lir aser meimchir temeden akhümtsübuba den tamangba yimsü ajak sadoka amangtettsü atema bangjemba tezüngzüktep lir.

OLONG PAITEP # 5693



TIPILEN

1. Yakob tetsü - (6)
4. Mezüing nisung - (4)
6. Tasen lai kakat ka - (5)
9. Au lanu - (2)
12. Tejen lai 21 buba - (11)
15. Tekolak tembar - (2)
16. Zütsüra anepsang - (5)
17. Kain tenu - (4)
18. Hana-er jabaso - (6)

LANGTSÜNGLEN

2. _ _ _ gki - (3)
3. Telungpur telok ka - (2)
5. Tsüngremi mezüing poktetdaksüba - (5)
7. Tia - (4)
8. Yakob-er jabaso ka - (5)
10. Abraham tebutü - (4)
11. Rebeka kinungpu - (4)
13. Esau tenu - (5)
14. Tzünglu tilala aru - (4)
16. Jafet tebu - (3)
17. Teka agi kongshi - (2)

OLONG PAITEP # 5692 TELANGZÜBA


TIPILEN :

2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.

Agüja aliba noksa nung meputepi aliba 7 bushiang



TANÜBO NAI LANGZÜANG

Q. West Bengal brand ambassador shiba ?

- a) Amitabh Bachchan b) Shah Rukh Khan
- c) Naseeruddin Shah d) Anil Kapoor

===== (Taruba adok nung onoki langzüksü)

YASHI ADOK TELANGZÜBA : New Delhi



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo



1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?

2020 KÜM BOLLYWOOD ACTRESS RONGNUNG TAJUNGTIBA 10 :

1. Deepika Padukone
2. Alia Bhatt
3. Shraddha Kapoor
4. Kangana Ranaut
5. Anushka Sharma
6. Katrina Kaif
7. Kriti Sanon
8. Kareena Kapoor Khan
9. Tapsee Pannu
10. Bhumi Pednekara



SUDOKU # 5734

	4	9					5	3	8	2	5	7	4	1	3	9	6
	7			8				2	4	6	1	9	5	3	2	7	8
				5		7			9	7	3	8	2	6	1	5	4
		2	9			4	6	1	5	3	4	2	6	9	7	8	1
9	6		8		7		3	5	6	8	9	5	1	7	4	2	3
5	3			2	6			7	7	1	2	3	8	4	9	6	5
3			5				8	4	3	5	8	4	7	2	6	1	9
2		6	4	1			7	9	2	4	6	1	9	8	5	3	7
			7	9		5	2	6	1	9	7	6	3	5	8	4	2

TELANGZUBA # 5733

OJANG LUTEP # 5281

- KÜMTABO :
- HOSCOL :
- NURTTAEM :
- JAAK :
- HOOSCLI :
- EMASAD :
- TTSÜOTESA :
- ANGLENM :
- GMOKJALAPNA :
- ENAM :

OJANG LUTEP TELANGZÜBA # 5280

LENIR TASA TAJUNG AJANGA LENDONG TIMTEM
NUNGI AIBEN TELOKJI KÜMZÜKER

TAN HOPTA ATEMA - KOMA SÜLA ?

Q. Nagaland nung government mapa nung backward kintem atema reservation ayuba ya kin apia (tribe wise) masü saka kibong nun? senotsü ajangzüktetba apia (economic class) ayu nunga koma süla ?

Olong 20shi nung January 15, 2021 tashi nung iba telangzuba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsütsü.



Jaipur, January 13, 2021: Bodhbarnü Jaipur nung aliba storage facility ka nung health worker temi Covid vaccine bener aruba noksa nung angur.

Taruba state assembly elections atema EC-i MHA den o lemtepo

New Delhi, January 13 (Agencies): State pezü - West Bengal, Assam, Tamil Nadu aser Kerala den Union territory of Puducherry nung elections agitsü mapang ana nung lia Election Commission (EC)-i Union home secretary den senden mena item states nung Central para-military sepaitem yoktsü atema o lemtepo.

Election Commission nung tongti ketdangsertem aser Ministry of Home Affairs (MHA) nungi home secretary Ajay Bhalla nung Nirvachan Sadan nung senden amen. Taruba hopta Election Commission nungi ketdangsertemi West Bengal aser Assam state na semdanga election atema terenemshiba jenjang asadangsü.

West Bengal nung Deputy election commissioner in charge, Sudeep Jain-i tang state tesem balala sema senzüdar aser DG, ECI, Dharmendra Sharma-ia Assam nung tesem balala semdanga election atema terenemshiba jenjang asadangdar.

Osang angazükba agi, EC-i senior DEC, Umesh Sinha aser MHA special secretary, Praveen Kumar Srivastava na den senden asemben tashi menogo.

State pongu nung assembly elections ji CBSE Class XII aser Class X tatidang matongdang tenzüksü. Item exams ya May 4 nungi tenzüksü.

West Bengal nung election mapang tensa raksaba nung ajemdaker state nung election

shilem 5-7 shi lemsar agitsü, ajisüaka tang tashi telemteba magi.

West Bengal nung opposition party aikati election ochishia agitsü aser tiptema agitsü atema inyakdaksüner, ta EC dang mepishiogo. Ajioda West Bengal nung aliba polling booths ajak nung Central sepai peria yoktsü.

Ano külen EC-i ashiba agi, coronavirus wara nung ajemdaker yaküm Bihar election nung polling station nung nisung kanga menungteptsü atema polling station tali amenokba ama election agitsü aliba states/union territory pongu nunga polling stations tali amenoktsü.

Yaküm Bihar assembly elections nung polling station tali 23,000 amenoka liasü.

India nung Covid tashidak tasenba nisung 102 dak putetogo

New Delhi, January 13 (Agencies): United Kingdom nung mezüng putetba coronavirus tashidak tasenba India nunga nisung 102 dak putetogo, ta Union Health Ministry-i metetdaksü.

January 11 tashi nung India nung nisung ajak agi 96 dak iba tashidak puteta liasü.

Bodhbarnü Health Ministry-i, "Tanü tashi nung nisung ajak agi 102 dak UK nung putetba tashidak tasenba putetogo," ta metetdaksü.

Parnok ajak peipei state indang health facilities nung temeja takdang nung yur anepaludar. Parnok ajurua alir kinüngertema quarantine südar aser parnok den külemi ainlen senzürtem aser tangartem contact tracing südar.

Iba tensa ya junga mita reprangdar, iba denji külemi surveillance agitsü, iba tashidak nokdangsü, tendangsü aser INSACOG laboratories dangi samples yoktsü atema mapang shia state tem nem osang

metetdakja arudar, ta Health Ministry-isa metetdaksü.

UK nung putetba tashidak tasenba ya Denmark, Netherlands, Australia, Italy, Sweden, France, Spain, Switzerland, Germany, Canada, Japan, Lebanon aser Singapore linüktem nunga putetogo.

Osang angazükba agi, UK nung tama putetba tashidak tasenba ya coronavirus tejenba dang nungi shilem 70 agi temelaba menateper.



January 13, 2021 nü Amritsar (Punjab) nung Aam Aadmi Party (AAP) nung züngsemtemi Lohri benjung amongba mapang Centre sorkar anema aluyimba ozüng kaketterm rongdokba noksa nung angur.

Aluyimertemi SC obendang pelaa agizüker; maneni longkak aittsü

New Delhi, Aenjeti/January 13 (Agencies): Supreme Court-i Centre sorkar dang aluyimba ozüng tasen asem soita atatsü atema tetuyuba agütsübaji pelaa agizüker, ajisüaka item ozüng asemprong magien tashi aluyimertemi longkak aittsü, ta aluyimertem unions balala nungi lenirtemi metetdaksü.

Aluyimertem unions 40-i akümba Sankyukt Kisan Morcha tenteti, Supreme Court-i tuyuba ama committee ka metentet tashi parnoki kecha meinyaktsü aser iba dak sendakba nung Morcha-i telemteba ka agitsü, ta metetdaksü.

Osangbenertem den jembidang Morcha nung lenir, Abhimanyu Kohar-i, "Court-i sorkar dang aluyimba ozüngtemji soita atatsü tuyubaji onoki pelaa agizüker, ajisüaka onoki item ozüng ajak agiendaksüner," ta metetdaksü.

Ano Morcha nungisa lenir,

Harinder Lokhwal-i, aluyimba ozüng tasen asempronglaji magien tashi onoki maneni longkak aittsü, ta metetdaksü.

Mongolbarnü (January 12) Supreme Court tetuyuba ka magütsü tashi ozüng tasen ajakji soita atatsü Centre nem metetdaksüogo.

Aluyimertem tebilemtsü onük bentettsü atema Supreme Court-isa züngsem pezüi akümba committee ka tentettsü aser iba committee nung tekolakji taoba mapang Chief Justice of India menden nungi anisüngzüker alir ka asütsü.

Osang angazükba agi, iba committee nung züngsemtemji Harsimrat Mann, Dr Pramod Kumar Joshi, agricultural economist Ashok Gulati aser Shivkari Sanghatna züngsem, Anil Dhanavat nung asütsü.

Bodhbarnü Lohri benjung anogo nung Delhi arrtsülen longkak aiter aluyimertemi Centre sorkari benokba ozüng kaketterm rongdoka longkak aitogo.



Mathura, January 13, 2021: Bodhbarnü Mathura nung BJP MP, Hema Malini-i Centre sorkari benokba aluyimertem ozüng dak sendakba nung osangbenertem den jembiba noksa nung angur.

BJP anema raratsü atema TMC-i Left aser Congress teyari meshir

Kolkata, January 13 (Agencies): Bodhbarnü Trinamool Congress (TMC)-i Left Front aser Congress dang, West Bengal chief minister Mamata Banerjee-i BJP tangatetbatem anema raraba nung yaridaksüner, ta mepishia metetdaksü.

Züngsem 294 aliba state assembly atema election taküm April-May nung agitsü.

Kolkata nung osangbenertem den TMC MP, Sougata Roy-i, "Left Front aser Congress party ya BJP anema nokdakba party tem süra parnoki Mamata Banerjee-i BJP pur telemsa adokdaksüba anema raraba nung yaritsü," ta ashi.

BJP anema nokdakba secular lenir tongtiji TMC tongti, Mamata Banerjee lir, ta pai ashi.

Roy-isa, Centre nung BJP-i aniba sorkari benokba schemes ka danga takok ngua

meinyaktet, ta ashi.

Tawa Union home minister, Amit Shah-i West Bengal semdangba aija Roy-i, "Tesem balala nungi chiyunga senzüba dang nungibo pai (Amit Shah) arrtsülen semdanga BSF sepaitemi mapa junga inyakdar asü meinyaker, ibaji asadangba tajungba süla," ta ashi.

Taruba assembly election nung BJP nungi Chief Minister candidate ji BJP state Tir, Dilip Ghosh asütsü asü?, ta asüngdangba langzüdag Roy-i, ibaji BJP-i dang metet, ta ashi.

"Yimtenren tsütsü Ghosh dang nungibo 2015 küm nung ang yimtenren nung ajemoksang Diamond Harbour MP aser TMC youth wing tongti, Abhishek Banerjee kanga agia tajungba. Ajisüaka pai (Abhishek) kodanga TMC dang pa chief minister candidate asütsü atema masüngdang," ta TMC MP-isa metetdaksü.



Kuala Lumpur, Malaysia nung January 13, 2021 nü check point ka nung police aser sepaitem nokdaka aliba noksa nung angur. COVID-19 tashidak prokshia aoba azüoktsü mechi Malaysia nung Bodhbarnü nungi tenzüka hopta ana atema tenokdangba tasen ka benokogo aser linük indang health care system telaor lir, ta ashir.

Indonesia-i tayimtsü indang cockpit recorder bushiba anena atar

Jakarta, Aenjeti/January 13 (Agencies): Nisung 62 mener ali nungi apusor mapang tatsüka lir tsükokba Sriwijaya Air indang cockpit recorder bushiba maparen Indonesia-i Bodhbarnü khen atema anentsüogo.

Java Sea nung iba oset bushiba ya tzüngsang majungba ajanga khen atema anena atatsüsa akum, kechiaser tzüsem ya feet 8.2 tashi temaleni nungteta adoker, ta ketdangsüri ashir.

Bodhbarnep tzüshirtemi tayimtsü teraksa aser asür ka indang Identity card raksar aliba ngutet, ta Navy ketdangsür Abdul Rasyid-i Indonesia nunger navy ship Rigel nung aliba osangbener dang ashir.

Tzüshirtemi Mongulbarnü tayimtsü indang flight data recorder (FDR) agiteta liasü aser cockpit voice recorder

(CVR) nung sendaka aliba oset ka ngutet, ta ketdangsürtemi ashir.

Tzüyim telung nung mita reprangtsü atema remotely operated underwater vehicles (ROV) ka Bodhbarnü yoktsü, ta Abdul-i ashir aser CVR nung sendaka aliba oset salazüka aoba sülen signal kecha magütsüba ajanga iba oset bushitsü tasakba akumer, ta paisa metetdaksü.

"Onok ket nung ROV lir aser iba ya ajanga ano bushitettsü aser asüng onoki tzüshir yoka iba tesem nungji maneni bushitsü," ta pai ashir.

Iba recorder ya tekeratiba nung angutsü tamang kateta lir, ta mitkar tekolakba, Hadi Tjahjanto-i Mongulbarnü ashir.

Honibarnü Boeing 737-500 tayimtsü ya Jakarta nung tayimtsü anendak tongtipa nungi ayamesor minute pezü lir Java Sea nung tsüok.

Iba lendong ajuruba jangjatetsü atema bushisüngdang temi black box ana nungya metaloka lir.

Indonesia indang National Transportation Safety Committee (KNKT) ajanga FDR indang data ya anogo ana nungi pongu tsüngta download asütsü imlar.

FDR nungya track ti indang data ghonda 25 shi indang alir aser CVR nungya sensaksemba minute 30 shi indang mangaoka alir, ta 2008 küm tsükokba kasa model, Boeing 737 indang final report nung shia lir.

Bushisüngdang yaritsü atema U.S. National Transportation Safety Board nungi telok ka Jakarta-i arutsü.

KNKT ajanga mezüng bushitetba nungbo tayimtsü ya tzü nung kongshiba mapang tayimtsü indang gol shidak liasü, ta ashir.

Kremlin anemsang Alexie Navalny Russia-i aotsü

Moscow, Aenjeti/January 13 (Agencies): Kremlin anemsang Alexie Navalny-i Bodhbarnü ashiba agi, pa Germany nungi January 17 nü Russia-i meyipa aotsü. Pa dak miim mozü amshiba sülen tang pa Germany nung temang anepalua munga lir aser pa par linüki meyipa aoba sülen pa anema ken o benoka tepuokdak ayutsü akok, ta aikati tsübuu bilemer.

Tir Vladimir Putin anemsang Navalny ya taoba küm August ita tayimtsü nung süchia aoba sülen temang anepalutsü atema Germany-i tayimtsü nung bener ao, aser pa tepsettsü meranga Novichok nerve agent amshi, ta Germany aser danga anüolen linüktemi ashir.

Saka Russia ketdangsürtemi iba tatalokba nung shilem kecha agia mali, ta ashir.

"Meyipa aotsü atema tasüngdangtsü kecha mali. Kechiaser ni kodanga yutsür mao. Parnoki ni tepsettsü



merangba kisüng mechi ni intensive care box nung inoker Germany-i aru," ta Navalny-i Instagram nung zülutsü.

"(Tir Vladimir Putin'er) kilir temi akhi ama ni anema ken o tiazü benoktsü meranger. Saka parnoki küdak kechi inyaktü ali, yangji ni tejangraba mali. Russia ya kü linük, Moscow ya kü yimti aser ni aji menungrar," ta pai zülutsü.

Navalny-i pa temang junga kumogo, ta ashir.

Court indang document tem

nung Russia ketdangsürtemi court dang pa tepuokdak ayutsü aliba khen asoshi atasaba inyakyim nung aibelenba atema tepuokdaki yoktsü asüngdang, ta sayur anogo ka lir pai iba osang ya sangdonger, koba yimtenren nung ajemdaker aitsüba ken o ka lir, ta pai ashir.

Russia indang Federal Prison Service (FSIN) ajanga taoba ita Navalny ya tekeraba nung linüki meyipa shilanga Moscow office nung osang agütsütsüla, aser aji mesüra tepuokdak ayutsü, ta totuyuba agüja liasü.

September ita parliamentary election agitsü lia Russia ketdangsürtemi pa linüki arutsü tsübuu bilemdaktsütsü meranger, ta pa aser pa busemertemi ashir.

Pa dak miim mozü amshiba kuli kecha mangur aser pa yirutsütsü memerang, ta Russia-i ashir. Danga Russia senso ama Navalny mashi mapang Russia-i meyipa shilangtsü nokdanga mali, ta Kremlin-i ashir.

Sorkar anemertemi CAR yimtiba amaktsü merang

Bangui, Aenjeti/January 13 (Agencies): Central African Region nung sorkar anemertemi Bodhbarnü linük yimtiba, Bangui tezülen anasü nung amak tenzü, saka meyipa yok, ta ketdangsürtemi ashir.

Bangui nung alir kati, ola tulu adoka apokba angashi aser mapang tatsüka lir helicopter tem yimti müketa senzüba angu, ta ashir.

"Lendong agütsürtem ya Bangui agitsü atema telok tulu aru saka tasü ita nokdaka meyipa yok," ta Ato Kilonser Firmin Ngrebada-i Facebook post ka nung ashir aser nüburtem dang süngjema alitsü ayongzük.

December ita election nung Tir Faustin Archange Touadera tanaben shimtetba sülen army unit tem nung anepbongi amakba ya linük yimtiba anasatiba alatokba lendong mezüngbuba alitsü.

"Onoki anepdang 6:00 ako nungi prangbong ola angashi. Onok kilung nungi ayazüka maor - yangji lendong lir. Onok injang tsübur," ta Bangui nung alir Rodrigue-i osangbener dang ashir.

Mangatetep agi sünger December 27 nü election agiba

mapang sorkar anemer telok tem temai adokba sülen tensa tamajungba akumba iba lendong yagi sayur. Taoba ita item telok yagi Bangui anasa aliba jila tem maka liasü saka parnoki aginüba ama linük yimtiba metongtet.

Telungpur temeyoktep telok kati election agiba mapang timtem agütsütsü merangba yong tashiyim amshia sorkar atsüngdoktsü merang, ta tai tonglokja lir, aser parnoki Bangui-i arutsü nangzüka lir.

Bodhbarnep parnoki linük yimtiba nungi kilometer 9 aser kilometer 12 pilar aliba army brigade ana dak tenük yoker amak, saka parnok meyipa yok, ta Interior Minister Henri Wanzet Linguissara-i osangbener dang ashir.

CAR nung tashi tain sorkar anemer telok trok lungjemer Touadera tanaben election nung tokteptsü aliba noksangtsü meranga azüdokshi tenzüka liasü.

Pai iba election nung takok nguogo, ta January 4 nü sangdonga liasü.

1960 küm France nungi nüjiso anguba sülen CAR nung tashiyim amshia sorkar ponguben tashi atsüngdokogo aser sorkar anema aiben rongrong tesashi adoka lir.

Kuwait PM-i emir nem cabinet resignation agütsüogo

Kuwait City, Aenjeti/January 13 (Agencies): Kuwait Ato Kilonser Sabah Ali Khalid Al Sabah-i par cabinet mapa nungi anenba indang osang Bodhbarnü emir Sheikh Nawaf Al Ahmed Al Sabah nem agütsüogo, ta state news agency KUNA ajanga ashir.

National Assembly aser sorkar tsüngta tang tesendaktep mejungi akumba mechi Deputy Prime Minister Sheikh Hamad Haber Al Ali Al Sabah-i cabinet züngsem ajunga menden nungi aluba indang Mongulbarnü agütsü.

Iba ama menden nungi aluba osang ya ato kilonser nem agütsütsüla aser agizüktsü atema emir nem agütsütsüla, ta Kuwait indang constitution nung shia lir.

Ato kilonseri sorkar kumtetba mapang constitution nung aibelen aser cabinet work programme magütsütet, ta parliament züngsem 38-i tai tongloktsüba mapang iba ya ataloker.

Totzü nung takatait linük nungya ozüngyanglurtem aser chubar kibongi aniba sorkar tsüngta küm ter dak tema mangatetep adoka linük anokshija arur, kong parliament aser cabinet aiben anena arur.

Ochimashi aser telung nung meputep lir ta tai tonglokja taoba cabinet ya 2019 küm November

ita menden yutsü aser tang aliba cabinet ya 2020 küm December ita election agiba nung meleba alitsü.

Gulf linüktem rongnung parliament züngsem ajunga election nung shimtetba linükji Kuwait ya dang lir, kong legislative tashi jenti amshiteter aser minister tem vote amshia office nungi atsüngdokteter.

Gulf nung elected parliament tejentibaji iba linük nungya lir, saka constitution kübok emir nem tashi onsara agüja lir aser sorkari shisa agütsüba nung ajemdaker legislature anentsütsü akoker.

Gulf linük timba nung ama Kuwait rongsenketsüng aser state budget nunga coronavirus aser totzü jenjang ajemba agi kanga mejungi kongshitet.

December ita election agiba mapang opposition mesüra allied candidate temi parliament nung menden 50 aliba nungi tesadang ka jungnüa nguteta liasü.

Arishi küm 91 nung Sheikh Sabah asüba sülen emir tasenba, Sheikh Nawaf Al Ahmad Al Sabah ya September ita mendeni atu.

Kuwait nungeri linük nung temelenshi arudaktsütsü tejangraba lemsatepogo, kong nütsüng yongsük million 4.8 aliba nungi shilem 70 bo bendanger dang lir.

Minister Kaito-i Sataka nung Jubilee nüngshilong sayatsü



Minister for Agriculture & Co-operation G. Kaito Aye aser Ketdangsürtem, Satakha Range Students Union Hon Jubilee nüngshilong lapoktsüba sülen tangokba noksa nung angur.

Dimapur, Aenjeti/January 13 (TYO): Minister for Agriculture & Co-operation, Nagaland, G. Kaito Aye-i, January 13 nü Zunheboto district kübok Satakha jila nung Satakha Range Students Union (SRSU) Hon Jubilee nüngshilong sayatsüogo. Nüngshilong sayaba sentong nung Deputy Commissioner, Peter Lichamo, sorkar ketdangsürtem, kaketshir lenirtem aser jila nung aliba nüburtemi shilem agi.

Sentong nung o jembiba mapang Kaito-i, kaketshirtem dang pei dak tamang akatsü, tangar dak metaloker malitsü

aser tangar nungi teti tajung dang angutsü imlaa teli ta ashi. Paisa, takaratiba nung PHC Satakha, yimpden asem aketba mozüki ka küm ajungkettsütsü atema pa nükla aliba lemsatep. SRSU kübok taoba küm 50 tashi kaketshirtem renloka aoba aser takoktem atema tenüsang agütsüba den pai kaketshirtem dang jenjang temaba tongtetsü atema meranga inyaksü ajungshiba den Sataka nung alirtem dang teti longjemer alitsü ayongzük.

Tatem nung Kaito-i, kaketshirtem mapaji bendanga agüja kaketshisatsü bushitsü

aser lenirtem aser representative mapaji parnok akokba tashi nongita yaritsü atema lir, ta ashi.

Nüngshilong sayatsüba sentong nung Pastor STBC, Rev. Kughato K Chophi-i bendanga agütsü sarasadem ayonga agi. Jubilee lapokba sentong ya Olivika M.Zhimo lenisüba kübok agi aser Anoka H.Zhimo-i tir o jembia liasü. Maneni sentong nung sobaliba tsüingsang (aphilokuwo) ka Shoipu yimtsüng nungi tsüingsangertemi saya aser Xüivi yimtsüngi aye küzü sentong agiba den tanga tetoktepbatem agia liasü.

Mopungchuket Tourism tera lapokogo

Dimapur, Aenjeti/January 13 (TYO): Mopungchuket Community Tourism Society (MCTS)-i Mopungchuket yimtsüng nung alima penzürtem atema talenba agütsür aliba tera salatsüba metetdaksüogo. COVID-19 tashidak poktetba ajanga taoba küm March ita nungi raliwalirtemi yimtsüng semdangtsü asoshi memelai liasü.

Talenba salatsüba nung shilem ka ama Süngkotenem Park semdangtsü atema

Deobarnü dak alaka hopta tepeyong anepdang 9:00 ako nungi nikongtsütsü 4:00 ako tashi park lapoka toktsütsü. Yimtsüng semdangertemi COVID-19 tashidak nungi jenboa alitsü atema tetuyuba agütsür aliba sülen tashi angaa anidaktsüla. Osang tejangja ka magütsü tashi yimtsüng nung alimapenzür mongchen ajak shibanga atatsü, ta MCTS Secretary Aridong Aier-i sangdong ka ajanga metetdaksü.

NSCN/GPRN (R)-i Sükrunyi benjung salem lemsatep

Dimapur, Aenjeti/January 13 (TYO): NSCN/GPRN (Reformation)-i Chakhesang nung aser sobaliba tsütsü aiür aser asangur chanutem nem tangazükba balala agütsür.

Benjung amungba mapang Chakhesang nung adianutem tarutsü nung yimjiyimjung nung liyonga aotsü aser Naga nung ajak atema yimjung osang abener akümtsü imlaja atar, ta MIP sangdong ka ajanga metetdaksü.

tasen tenzük.

Maneni Sükrunyi benjung amungba mapang inyakyim aser sobaliba tsütsü aiür aser asangur chanutem nem tangazükba balala agütsür.

Benjung amungba mapang Chakhesang nung adianutem tarutsü nung yimjiyimjung nung liyonga aotsü aser Naga nung ajak atema yimjung osang abener akümtsü imlaja atar, ta MIP sangdong ka ajanga metetdaksü.

Peren DPDB senden menogo

Dimapur, Aenjeti/January 13 (TYO): 2021 küm atema mezüngbuba Peren District DPDB senden January 12 nü DC Conference Hall, District Hq. Peren nung menogo. Iba senden ya DC & Vice Chairman DPDB Peren, Sentiwapang Aier, NCS lenisüba kübok agi.

Taruba 72buba Republic Day benjung dak sendakba nung mapalemtem senden nung sensak asem aser ano January 23 nü lokti nübotoka mapa inyaksü atema telemtetba agia liasü.

Peren Government College Principal, Dr. A. Nshoga aser DPO UIP/RCH, Dr. Kiholi nati parnok inyakyim dak sendakba nung powerpoint presentation agütsü. Maneni DC-i Statistics, Sericulture aser Employment Department tem dang taruba senden nung department inyakyim dak sendakba nung PowerPoint presentation agütsütsü tetuyuba agütsü.

Senden tembangba sülen Peren District COVID-19 Task Force aser Vaccination Committee senden ka mena liasü.

Office of the Mokokchung Driving School Mokokchung : Nagaland Near Govt. High School Dilong Govt. Regd. No 002/DSL/MKG/2015 **JOB VACANCY**

Applications are invited for the post of Instructor in Mokokchung Driving School.
➤ No. of Vacancy - 01 ➤ Salary - Rs. 6500 (fixed)/-
➤ Rs. 1,50,000 /- life insurance coverage and other benefits.
Interested candidates may contact the office (10:00 am - 4:00 pm, Mon - Sat) along with one passport size photograph and Xerox copy of driving license.

Last date for receipt of applications is 30th January 2021.

Office of the Mokokchung Driving School Mokokchung : Nagaland Near Govt. High School Dilong Govt. Regd. No 002/DSL/MKG/2015 **Admission Notice**

On account of 6th anniversary, the Mokokchung Driving School invites interested candidates to undergo driving training and avail the benefits of;
➤ Free admission ➤ Training Fee Rs. 4500/- only
➤ Training period 3 weeks (5 days a week)
➤ This offer is valid till 30th January 2021

For more information kindly contact the office between 10:00 am - 4:00 pm (Mon-sat) or call - 07005750788 / 9615847157 / 7005749659

Kohima nung ki ka rongtok



Lower Officer Hill Colony, Kohima nung mi adokba tesem nung Fire Personnel tem mapa inyakba noksa nung angur.

Dimapur, Aenjeti/January

13 (TYO): January 13 agütsüba den telangzükba anepdang züngia 1:04 ako nung mapang shidak nung agütsüba Lower Officer Hill colony, ajanga temeket nung aliba kitem rongga aotsü nungi kümzükogo.

Iba lendong nung sen lakh 3 alang osettsütem kümzükogo aser sen lakh 1.60 alang osettsütem rongtokogo. Mi adokba kuli tang bushitsüngdangdar aser kasa mapang nung nisung asüba osang kecha mali. Mibenertem ya Duty Commander S.I Sevi Kera aser ASI Menose Zashumo nati anir ao.



IGAR (N) kübok Assam Rifles, Dimapur Battalion ajanga January 07, 2021 nü Prince Fernandes nem tajemtsü tzü agüja liasü, shibai Khatkhathi nung nükpoker atema NGO ka lapoka lir. Battalion ajanga iba ama mapa ya akhi mapang nungi inyaka arur.

Nagaland team-i wicket 9 agi Arunachal kokogo

Dimapur, Aenjeti/January 13 (TYO): Plate Group atema Chennai nung asayaa aliba Syed Mushtaq Ali T20 Tournament tanabuba asaya nung Nagaland team-i Arunachal Pradesh wicket 9 agi koka, 2020-21 season nung mezügbuba takok ngutetogo. Mezügbuba asaya koba Chandigarh den asayatsü liasü, iba asaya tsüngsang majungba ajanga masayatet. Nagaland team taruba asaya Sikkim den

January 15 nü 12:00 ako nungi tenzüka asayatsü. Nagaland team nungi arishi küm 16 tain asayar Khrievitso Kense-i mezügbuba asaya nung wicket ka agia liasü. Mezüing bat asütsüba sülen Arunachal team-i Over 20 nung wicket 7 out ser run 145 yanglu. Parnok rongnungi Doria-i run 36, Akhilesh Sahani-i 31, Rahul Dalal-i 31 aser Nazeeb Saiyed-i run 24

yanglu. Nagaland team bowler tem rongnungi Nagaho Chishi, SS Mundhe aser Khrievitso Kense nungeri wicket kaka agi. Asaya tanabuba shilem nung nagaland team-i over 15.5 nung asayar 1 out ser run 149 yanglua asaya akok. Nagaland team atema SS Mundhe-i out mesüi run 69, Chetan Bist-ia out mesüi run 50 aser Jonathan Rongsen-i run 20 yanglua liasü.

Premier League: Man United temaba jenjangi tuogo

London, Aenjeti/January 13 (Agencies): Mongolbarnü Turf Moor nung Burnley den asayaba mapang Paul Pogba-i goal ka idakja Manchester United-i goal 1-0 agi asaya akokba sülen parnok küm asem tsüingda tang mezügbuba temaba jenjangi tuogo. Point asem anguba sülen United pur defending champions Liverpool dang nungi point asem agi timba kümogo. Telok ana ya Deobarnü Anfield nung asayatsü lir.

Pogba tarutsü dak sendakba nung ken o aika adoka jembiaka pai United nung kanga tongtibang shilem agidar aser 2013 küm manager Alex Ferguson mapa nungi anenba sülen tang mezügbuba title atem tokteptsüpur rongnung parnoka densema lir.

Ole Gunnar Solskjaer-i aniba team-i season tenzüker mezügbuba asaya trok nung asaya ana dak koker liasü saka tang point 33 angutsü maongka aliba nungi 29 agitetogo.

Küm ka shi tejakdang Burnley-i Old Trafford nung 2-0 agi United akoba sülen

mapang tatsüka lir Bruno Fernandes alizükba ajanga United jenjang tajungba kümdaktsüogo aser club ana tanaben ajurutebba mapang iba tajangzüik reprangtetogo.

Asaya mezügbuba shilem nung United puri meyilongi asaya, kong VAR review aika agia liasü.

Luke Shaw-i Johann Berg Gudmundsson alangdaktsüba aser Robbie Brady-i Edinson Cavani alangdakja foul menaba ajanga review nung mapang minute pongushi intok aser telok anaprongla red card achitsü nungi jenboa liasü.

Shaw-i Johann alangdaktsüba sülen referee Kevin Friend-i asaya maneni asayadaktsü saka review agiba sülen pa nem yellow card ka agütsü aser Brady nema yellow card ka agüja liasü.

Asaya nungsa Harry Maguire-i goal ka idaktsü saka goal tongoktsüba mapang pai Erik Pieters dak anongba ajanga goal magi aküm.

Asaya tanabuba shilem nung United pur Burnley pur kanga nongshi asaya aser Cavani-i

goal idaktsütsü asoshi maongka tajung ana lalu.

Kasa mapang nung Pogba-i midfield nungi asaya azüoka asaya aser Marcus Rashford-i agütsüba ball ka pai metsüba Matt Lowton dak tsükdaker ai.

Goal kasasa kümdaktsütsü atema Burnley puria maongka angü, saka Matej Vydra-i metsüba ball Eric Bailly-i nokdang.

Molineux nung Wolves goal 2-1 agi akokba sülen EPL nung tang Everton pur jenjang pezüubai atuogo aser Unitet meneptsü atema point pezü dang nüngdaka lir

Asaya nung mezügbuba goal Alex Iwobi-i idaktsü, saka Ruben Neves-i Wolves pur atema goal ka idakja goal kasasa aküm.

Iba sülen asaya tanabuba shilem atemtsü minute 13 anunga lia Michael Keane-i Everton atema tanabuba goal idakja parnoki asaya akok.

Table ponglanglen Sheffield United pur asaya 20 tashi khen danga mekoki arur Mongolbarnü parnoki Newcastle goal 1-0 agi kokogo.

Hockey India, Odisha sorkar 2023 Men's World Cup atema renemshir

New Delhi, Aenjeti/January 13 (Agencies): 2023 Men's Hockey World Cup ayongzüka asayatsü atema küm ana anunga lia Hockey India aser Odisha sorkar na iba asayamung atema renemshi tenzüko. 1971 küm tenzüka sülen 2023 küm India-i iba asayamung pezübenbuba ayongzüka asayatsü.

Iba asayamung ya Bhubaneswar aser Rourkela nung 2023 küm January 13 nungi 29 tashi asayatsü renema lir.

2018 küm iba asayamung 14buba India nung ayongzüka asayaba mapang asaya ajak Bhubaneswar kübok Kalinga Hockey Stadium nung asayaa liasü, saka 2023 küm atema stadium ana amshitsü telemtetba agiogo.

Odisha Chief Minister Naveen Patnaik-i taoba küm December 24 nü Rourkela yimti nung world-class stadium tasen ka yanglutsü sangdonga liasü,

koba linük nung hockey stadium tulutiba asütsü. Iba stadium nung nisung 20,000 asemtsü.

Iba stadium nung modern facilities ajak inoktsütsü aser iba ajanga 2023 World Cup mapang asayar aser terprangertem nem tejangshiba balaka agütsütsü. Sundargarh district kübok block 17 prongla nung synthetic hockey turf yanglu tenzüko.

"2023 World Cup Bhubaneswar aser Rourkela nung ayongzüka asayatsü onok atema maongka aser tayongzüka ka asütsü. Bhubaneswar, Kalinga Hockey Stadium nung 2018 küm World Cup ayongzüka asayaba sülen Bhubaneswar nung facility tem timba lir aser kasa mapang nung Rourkela nung tang world-class hockey stadium tasen ka yangludar," ta Odisha indang Minister for Sports and Youth Services, Tusharkanti Behera-i ashi.

India nung 2023 World Cup

ayongzüka asayaba ya kanga tongtibang asütsü kechiyong iba küm India nüjiso ngur küm 75 ajungtsü.

Linük nüjiso ngur küm 75 ajungba küm Hockey India-i linük nung asaya reloka aoba sayatsü asoshi maongka anguba metoktsünüi liasü.

World Cup atema renemshiba dak sendakba nung Hockey India tir Gyanendro Ningombam-i, "Men's Hockey World Cup atonga ayongzüka asayatsü maongka anguba ya onok atema tetushi ulura," ta ashi.

"2018 küm World Cup kanga takok ngua ayongzüka asayaba sülen 2023 küm FIH Men's Hockey World Cup nung asayar aser terprangertem atema facility tajungba agütsütsü atema onoki inyaktsü. Iba maparen ya jangrademtsüka aser 2023 World Cup atema küm ana shidak anunga lir," ta paisa ashi.

Aryna-i Abu Dhabi Open kokogo



Aenjeti/January 13, 2021 (Agencies): Aryna Sabalenka-i Bodhbarnü Abu Dhabi Open final nung 6-2, 6-2 agi Veronika Kudermetova kokogo. Lai tang agi tour title tasembuba aser asaya 15 atonga kokogo.

Iba asayamung masüdag Belarus tsürla yagi taoba season tatem Ostrava aser Linz nung indoor asayamung ana kokogo aser October ita French Open round pezüububa tonga asayaogo.

Sabalenka rankings nung jenjang asem tejakdangi tua jenjang tenetbuba tongtetogo. Kasa mapang nung

Kudermetova tang mezügbuba tour final nung asayaa liasü.

Australian Open metenzük tsüingda asayartem nem asayatsü atema maongka agütsütsü asoshi WTA-i Abu Dhabi nung asayamung ya aritepa ayongzüik. Coronavirus tashidak pokteter aliba ajanga Australian Open ya February nung asayatsü atema telemtetba agiogo.

Sabalenka aser Kudermetova na Australia-i aotsü aser Australian Open aser warm-up asayamungtem nung shilem magi tsüingda quarantine nung amungtsü.

Thailand Open: Kashyap yirur masayatet; Rankireddy-Chirag nati takok angu

Aenjeti/January 13, 2021 (Agencies): Bodhbarnü Thailand open mezügbuba round nung Canada nunger asayar Jason Anthony Ho-Shue den asayaba mapang Parupalli Kashyap masayatettsüsa küma tuguadok.

Game tasembuba nung point 8-14 agi mekoki aliba mapang temola tetsü atsüba sülen Kashyap-i masayatsü atema telemtetba agi.

Pai mezügbuba asaya 9-21 agi makok aser tanabuba game 21-13 agi koker liasü.

Tebur tarep asaya nung Satwiksairaj Rankireddy aser Chirag Shetty nati 19-21 21-16 21-14 agi South Korea nunger tarep Kim Gi Jung aser Lee Yong Dae na kokogo.

Rankireddy aser Chirag na ya tenati rangketa repranga

aliba asayar akokba atema kanga pelar. "Asaya tenzüka mapang Lee Yong Dae ya künaprongla indang idol liasü, ajungi tanü pa den jangradema asayaogo aser akokba atema kanga pelar," ta Satwiksairaj-i ashi. "Künati takok tashi attack süa asayatsü tasa asa, saka aritepa masü. Mezügbuba game nung kanga aritepa asayaba ajanga point kar lalu, saka künati koma asayatsü aji jangjaa liasü," ta Chirag-i shisem.

Kasa mapang nung Arjun Madathil Ramachandran aser Dhruv Kapila na Malaysia nunger tarep Yew Sin aser Teo Ee Yi nati 21-13, 8-21, 22-24 agi kokogo. Tarep temeyoktep asayar N Sikki Reddy aser Sumeeth Reddy B nata Chung Man Tang aser Yong Suet Tse nati 20-22, 17-21 agi kokogo.

BILEMDANGANG

"Nükmen aira nükjidong matongtsü."